

[Augsburg], 7. Juli 1565

An Johannes Oporinus

UB Basel, Fr. Gr. I 11, fol. 278r.

Steinmann Nr. 768

Lit.: Husner S. 160.

S. P. D. An meas literas a D. Carino, qui pridie idus Iunias hinc discessit, acceperis, Oporine humanissime, dubito, eaque de causa remissior sum quam pro consuetudine mea veteri. Petij autem, vt quicquid Isocraticum α me ad te perlatum esset (Nam chartas nonnullas vna cum tabellario perissem puto) ad me remitteres, quo magis opus σύμφονον fieret. Sub autumnum te inchoaturum Isocratem scribis. In quo ego tibi in mora non ero. Praeparata est materia et locuples et multiplex, quae descriptionem et emendationem requirit, quorum vtrunque vel cum maxima molestia mea et impensis curabo, si te HOC AGERE intellexero. Nec enim, Mi D. Oporine, φίλοτίμως διάκειμαι. Sed in ijs autoribus, qui α me conuersi, α te excusi sunt, et emendandis et illustrandis, nullum, quem imbecillitas mea sustinere possit, laborem defugiam. D. Charinum, si apud vos adhuc est (Suspicio enim suorum negotiorum causa profectum in patriam) officiosè et amanter meo nomine salutes velim. Doctissimus et humanissimus senex et de me et de plurimis pro virili bene meretur, et tibi quoque profuit et prodesse poterit. Quare commendatum eum habeas velim, vbi ad vos redierit. Epithalamium antea scripsi ne α me expectares, cuius ea valetudo est, vt ἐπιτάφιον mihi ipsi scribere debeam. Neque sanè illustrius monumentum relinquere potero, quam si Deus eò vsque vitam mihi propagarit, dum Isocratem, Aeschinem, Demosthenem pro virili illustraro. Tu cogita, quanto iucundius viuerem, nugis istis, vt vulgo habentur, omissis. Res tuas florere et spero et opto. Sed ne noua nupta tuam industriam minuat, vereor nonnihil, quam tuis moribus esse aptam et rei familiaris adiutricem ex animo tibi gratulor. Vale. Nonis Iulij 1565.

Hiero[nymus] Wolfius
Tuus.

Ignosce festinationi.